

## **HILEMONI'NI LUHUVO NITE' PAULO' GIZE-DINE'**

Paulo' Hilemoni'ni Luhuvo Nite' Gize-dingumu' Gomu' Gataa' Gamazi

Mene luhuvo nite' nene aposolo' Paulo' gize' ve. A'mine Paulo' monovo'vemu' nene Aposolo bukoo' nene gatelesane. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomu' gataa' gamazi gizuningukisi nene ei' Paulo' monovo'vemu' nene ma gatelesane. Ido' mene luhuvo nite' gize' nene ve ma gulive Hilemoni'nimu' gize' ve.

Ido' a'mine luhuvo nite' mene Timoteo' nesi nohulusive lo ido' Hilemoni'ni nohulogedo evene' linge masi nohulo-lingidusive lo gize' ve. Ado' Izesu' evenele zuho linge Hilemoni' numu'veu' mulise milaa' ave engikisi ido' vene' ma gulive Ahia' ezese ido' ve ma gulive Alakipo'nisi lengi' nohulo-lingidusive lo gize' ve. Ahia' aza Hilemoni' elenaho minine' noloseive ido' Alakipo' aza engi' gipe'ine mino a'mine mulise aleveliti gizebo ve ma minine' noloseive li evene' vai' nene gili nizave.

Hilemoni' aza Loma vete gizebo ani' polovinisi Asia ve laa' angu' Kolosa ebeku' ongo monaa' ine' ve. Gamene ma Paulo' aza Izesu' Kilisito'nimu' gamazi lamine' lo soto' ogo lo-ngimine' nene gelo Hilemoni' aza Izesu' evenele lolo' ine'. Hilemoni' gelekele' ve ma minine' gulive Onesimo'. A'mine gulive Onesimo' ne'mi monovo nene gono daato' lisihe' o minine' ve losa ve. Ne neiha Onesimo'

aza Hilemoni'ni hulo-do golise vogani'. Hilemoni' inite've linge ma nesi nene gumine do vo noloseive. Golise vo Loma ebeta vo minine'. Onesimo' Paulo'ni nado ningihe ne gelamune'za aza Paulo'ni ningo Izesu'nimu' line' gamazi gelo a'mido' gele ele'vole' ogo Izesu' evenele zuho lolo' ine'. Ne'mine ogo a'mida gamene linge mamu' mino Paulo'ni hize ele' o-divo Paulo' aza Onesimo'ni nene ei' gipele gehepeve gilivo lulo imine'. Paulo' aza Onesimo'ni nene ei' gonou' ve minelive lo do minelesa giline'za Hilemoni'nida longo' amine' nenakoo nemu' lisihe' amoloseive lo gelo nemu' gohi Hilemoni'nida imisele hulolosa giline'. Gelekele' ve ingine gizebo ve'ine huli-ngidi golise vani' nene lihime nabalo' ngimaa' ani'. Gamene ma nene ngibili hilaakisi iga' ani'. Nemu' Paulo' aza luhuvo nite' mene gizo Hilemoni'ni ti' lo lo-imine': Onesimo' mene tine' molo gei' nanida novivo ma aza gei' gelekele' veka neiha Izesu' evenele lolo' idoti' nene gei' zuho gehepeve lolo' ine' nenaze. Nemu' geze zuho ngele'mize lamine' oga' nanidi'mine ogo ele'mize lamine' ozo. Ne'mine lo Onesimo' aza Hilemoni'ni inite' ma golo hize-deline' noline' nene ei' Paulo' golo hize-gedelove lo lo hukine'. Ido' O'moso'mo eita lado' nene gele ngemo nala' numunguti' nene hulo heta o-nedeleseive lo gelo nemu' Hilemoni' numu'veu' lumu hamo' ma ei' Paulo' alingumu' do va'va' o-delive lo gizine'. Ne'mine lo luhuvo nite've nene gizo osu' lo evene' lingelite mese' aseka li-ngidani' nesi gizo no'noho' gamazitunu' gizo osu' line'.

Paulo' aza mene luhuvo nite' gizine' gameneukovo' nene Izesu' evenele zuho Kolosa

ebeku' minanikisi ido' Eheso ebeku' minanikisi nene gizo hulo-ngidine'. A'mine luhuvo nite' setohamo nene Tikiko' do novivo Onesimokisi maka' vasine' ve.

*Paulo' Luhuvo Nite' Api' Ogo Gizelesa Hilemoni'ni Opo'ni Lo Gizine' Gamazi*

<sup>1</sup> Luhuvo nite' meve nene Izesu' Kilisito'nimu' ve lo nalato' nouve Paulo' nenitatikisi ido' leze zuho Timoteodatikisi nene novive. A'mine luhuvo nite' meve nene lelikisi hamo' gono daa' nounive lute geme nonive Hilemoni' geikumukisi <sup>2</sup> ido' leze zuho vene' Ahia'nimukisi ido' monoli'mi lovou' maka' zege' zege' oga' unive Alakipo'nimukisi ido' Kilisito' evenele gei' numungau' mulise milaa' naave engikumukisi nene nogize-lingiduve. <sup>3</sup> Nemu' nene luhuvo nite' mene nogize-lengedo O'moso metehosi Guvetesi ve Izesu' Kilisito' neesi nasahili' i-lingidikesivo ne'mo lengi' muludingu' nene hongu minivoo mine lamine' igi minilizave loo O'mosola noluve.

*Paulo' O'mosola Laa' Ingu' Nene Hilemoni' Monovo've Laminekumu' Gelo A'minemu' Isaa' Neve Lo-daa' Nouve Lo Hilemoni'ni Lo-imine' Gamazi*

<sup>4-5</sup> Hilemoni' gaza Guvelesi ve Izesu'nimu' gele ele'vole' ogo mino luka ezesi ido' O'moso'mi evenele mukikisi ngemaa' naningumu' nene gelosa naza O'mosola laa' nouvongu' nene geikumu' gamene gamene isaa' neve lo-daa' nouve. <sup>6</sup> Ido' a'mine O'mosola laa' nouvoni' nene gaza Kilisito'nimu' gele ele'vole' ogo leliku' omo gi'mizo naine' ne'mo nene laza Kilisitoda mine molo inite' lamine' daa' nounge' mukikumu' nene

gele osu' lo mineline losa O'mosola laa' nouve.  
<sup>7</sup>Ido' neze zuho make, O'moso isaa' neve lo-daa'  
 nouvoni' nene gaza luka O'moso'mi evenele  
 ngeme naine' ne'mo lu'ine amuzo gohi dani'  
 ne'mo nene lu'ne do ngi lo-nedavo mulu'neu'  
 gulumo avile atoli'mine ogo lisivoo nouvoni'  
 nenako nemu' nene O'moso isaa' neve lo-daa'  
 nouve.

*Paulo' Aza Onesimo'ni Nene Hilemoni' Gohi Do  
 Eita Ilingumu' Longo' Ogo Line' Gamazi*

<sup>8</sup>Naza amuzo molo lovo kiselevo' ogosa Kil-  
 isito' velemu' ogo gaza lisihe' o neine' inite'  
 me'mine nene ozo lo lo-huko lo-gedelodo' o  
 nouvoni'za <sup>9</sup>Kilisito' evenele laza lute ge neme  
 ne geme lo minelonido' o neinako nemu' nene  
 amuzo molo lo huko lo-gedamo asi haza nevo  
 longo' ogo gele-gedelesa nene noluve. Ee, Paulo'  
 naza Kilisito' velemu' medelo mino gamazi've  
 lo soto' oga' uve ido' idise a'mine Izesu' Kil-  
 isito'nimu' ve li nalato' huli-nimikave neni'  
 nene haza nevo longo' ogo gele-gedelesa nene  
 noluve. <sup>10</sup>Ido' longo' ogo gele-gedelesa nolu-  
 voni' nene nalato' mene minuvongu' meleho  
 lolo' okuvo aza izipaha'ne lolo' ive \* Ones-  
 imo'nimu' nene muhele' gamazi nolo-gimuve.  
<sup>11</sup>A'mine ve aza gomu' geikisi minasida nene  
 gonoka do-gedelido' lisihe' amo minine' ma  
 neine'za idise gei' gonokasi neni' gono'ne nesi  
 do-ledelido' lisihe' gehepeve ogosa neive. <sup>12</sup>Aza  
 neve nene neni' ve'ne gihile gehepeve neine'za

---

\* **1:10:** A'mine ve'mi gulive Onesimo' ne'mi monovo nene  
 ne'mino neive: Gono daato' lisihe' o neive.

a'minemu' nene gele hulosa geita gohi noimisele huluve. <sup>13</sup> Naza Kilisito' gamazi've lamine' lo soto soto' ogo minaa' uvongumu' nalato' mela nouvongu' geito' medelo mino gono'ne do-nedaa' ilingumu' nene nenikisi ha minelive lo gele minuha ma imiselamuvodine'za <sup>14</sup> geitati' gamazi ma gele nemamo nolinido' nene inite' do ne'mine mana'mine uvoni' gelalive losa nene alamuve. Ido' ne'mino alamuvoni' nene Onesimo' gono'ne do-nedelingumu' nene o've lo-deline' aka hize tile-gedekuvosa gaza monovo do lamine' ogo a'mine gono dalive loo lo nemeline' nene edamiline' o neivosa gasika nene lukalo' do molosa neni' gono do-nedelive lo lo nemeline losa nene alamuve. <sup>15</sup> Ido' O'moso'mo lavo gamene li'nibemukovo' gei' hulo-gedo hota vo minine' nene alinge' tine' molo ogo geikisi mudise minivi' minivi' ilisive lo nemu' hulo-gedo vihe losa nene gele nouve. <sup>16</sup> Ido' tine' molo ogo geikisi mineline' nene ha gonou' ve ne'minevo' nene minelivoba asi Kilisito' evenele geze zuho luka emelinido' o minelivesi nene mineleseive. Ee, neze zuho lu'ne eme lamine' o nouve lolo' ogo neiha geita nene gonou' ve minosa ido' Guvelesi vela gi'mizo minosa geze zuho gehepevesi nene lolo' ogo mineleseinako neni' lu'ne eme nouvoni' nene ivile' ivosa gaza nene luka vauve elosa emelinido' mineleseive.

<sup>17</sup> Nemu' nene gaza nenikumu' gelanivo zogo naa' olosive lamine' nane lo gele naine' nenako nemu' nene Onesimo' aza gei' nanida naayo ma nene naza nanida alodo' nele'mize lamine' iline' akalo' do molosa ele'mize lamine' ozo. <sup>18</sup> Ne'mine iline'za aza neve gomu'

maka' minasida ma do goloso o-gede nolihe ido' geitati' inite' malo' golo hizo ma gemelido' o neivo ma nene a'mine inite' mukito' nene neni' golo hize-gedeloze. Neni' gehe-nedezo. <sup>19</sup> Ido' a'mine mene neni' golo hize-gedelove noluvoni' gamazi nene do amuzo molalosa luhuvo a'me ve nene Paulo' neni' a'nedunu' gehepeve nogizuve: A'mine neve neni' golo hizo gemelesuve. Gemelesuha nenitati' dina' naba geita nene ha neine' ma neine'za naza a'minemu' nene ha luvodine'za ma lolosa gelamuve. A'mine dina' nene ado' Kilisito'nimu' neni' lo soto' ogo lo-gemekuvo ezemu' gele ele'vole' ogo minevo' minevo' gemeni dameni daningumu' nene noluve. <sup>20</sup> Ne neiha neze zuho make, laza nene Guvelesi ve'mi evenele nosine' nenako geitati' inite' ma daloho lo nogiluve. A'mine nene ado' Kilisito' evenele nosingumu' ve lo neni' lu'neu' do lamine' o-nedo gele emanivo Onesimo' nenita alive losa noluve. <sup>21</sup> Ido' ne'mine lo nogizuvoni' nene gaza longo' o-gedeloni' votigile ivile' ivosa inite' lamine' gohi masi imine' molo olosane losa gele nouvoni' nenako gamazi'ne mene mo gele dalosane lo gele mu'musi' o minosa nene nogizuve. <sup>22</sup> Ido' gamazi hamo' gohi ma neine' neve nene ne'mine lo noluve: Lingine nenikumu' ve li O'mosola laa' naani' malo' nene O'moso'mo gele lengemo neni' neve nene lengita nimiselavo alosuve losa gele nouze. Ongaloni' numuno lulo nene ma do va'va' o nimikezo.

*Paulo' Gamazi Gize Osu' Lolosa Ezesi Gono  
Daa' Avesi Hilemoni'ni Opo'ni Lani' Gamazi*

*Gizine'*

<sup>23</sup> Ido' nenikisi maka' Izesu' Kilisito'nimu' nalato' nosive Epahala' ne'mo nene gopo'ni no-live. <sup>24</sup> Ido' maka' gono daa' unive ado' Maleko' ve Alisitako' ve Dema' ve ido' Luka' ve engi' nete nene a'mine'mine igi gopo'ni nilave.

<sup>25</sup> Guvesi ve Izesu' Kilisito' nasahili've nene lengi' lutingu' mine molo minivoo.

**MONO' GODOLO GOSOHO'**  
**The New Testament in the Dano (Upper Asaro)**  
**language of Papua New Guinea**  
**Nupela Testamen long tokples Dano (Upper Asaro)**  
**long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 21 Feb 2024 from source files dated 31 Aug 2023

76c78bc1-63e6-5f61-a363-169051cfe72e